

四庫全書

集部

欽定四庫全書

集部

漢濱集卷二

詳校官起居注主事臣顧宗泰

主事臣呂雲棟覆勘

謄錄監生臣沈霽

欽定四庫全書

集部四

提要

漢濱集十六卷

別集類三

宋

臣等謹案漢濱集十六卷宋王之望撰之望  
字瞻叔襄陽穀城人後寓台州登紹興八年  
進士第累遷太府少卿孝宗即位除戶部侍  
郎充川陝宣諭使洊擢至參知政事勞師江  
淮為言者論罷乾道元年起為福建安撫使

加資政殿大學士移知温州卒事蹟具宋史  
本傳錢溥秘閣書目載有之望漢濱集而佚  
其冊數焦竑經籍志作六十卷然趙希弁陳  
振孫兩家俱未著錄則宋代已罕傳本後遂  
散佚不存今從永樂大典中採撮裒綴所存  
什之三四而已之望當秦檜柄國時落落不  
合人咸稱其有守其歷官亦頗著政績惟在  
隆興時力主和議與湯思退相表裏專以割

地啖敵為得計而極沮張浚恢復之謀考宋  
南渡之初自當以北取中原為務然惟岳韓  
諸將可冀圖功張浚狼愎迂疎但急於立功  
以固位實非可倚以恢復之人一敗於富平  
而喪師三十萬再歟於淮西而叛逃者七萬  
三挫於符離而喪師又十三萬僨轅悞國其  
驗昭然講學家以張栻之故回護其父殊未  
免顛倒是非之望之沮浚不可不謂之知人

至其論和氣之策以為南北之形已成未易  
相兼惟當移功戰之力以自守然後隨機制  
變又以為金人制勝之謀舉無遺策加以器  
械之利形勢之便雖漢唐全盛之時猶未能  
輕此敵而況於今日其斟酌時勢以立言與  
史浩意頗相近亦不可謂之不知時務特其  
朋比小人附和權倖與浩之出於老成忠蓋  
者不同又湯思退所主者乃六國賂秦之計

與浩之主於持重俟釁者亦復迥異故當時  
重為人所抨擊而宋史亦極不滿之誅其心  
也至其詩文則皆疏暢明達猶有北宋遺矩  
諸劄子亦多足以考見時事與正史相參未  
可遽廢僅釐為十六卷著之於錄庶其人其  
文是非得失各不相掩焉乾隆四十六年七  
月恭校上

總纂官

臣紀昀

臣陸錫熊

臣孫士毅

三十一

掛號

總校官臣陸費墀



欽定四庫全書

漢濱集卷一

宋王之望撰

賦

三王之道若循環賦

以道若循環代為終始為韻

百代稱治三王最隆各垂統以相繼若循環而罔終所  
尚不同要舉偏而補弊其周必復斯迭用以無窮稽古  
史之遺言見先王之政理雖革而信之者事有新故然  
因而循之者道無彼此列三正而異物關彼盛衰旋一

化而無端代為終始夏繼虞軌商因夏基或以忠而為  
治或變質而制宜暨彼周家之盛粲然文教之垂用有  
還復弊斯改為異世殊時雖靡聞于沿襲同條共貫曾  
不泥于操持上下千載之間周流六虛之內乘五德以  
迭王類四時而更代樞始得兮弛張無執柱不膠兮變  
通斯在本人情而立政時有污隆法天運以求端迹無  
留礙前之二帝兮其道淳而未備後之五霸兮其風駁  
而不純備乃盡變純斯可遵惟三代之甚善宜百王而

是因所遇殊塗琴更張而或解其歸一揆規宏遠以相  
循觀其先聖垂休後王繼作有可因而可革故或稽而  
或若用能歷萬世以無弊關百聖而不忤知其或繼宣  
尼推損益之原舍則無由揚子述太平之略逮乎桓文  
以後秦項而還霸道既禩王功孰攀喜利名者操賞罰  
而為柄善攻戰者生竒正以如環絕紐莫續異端曷刪  
所以宣帝勵精自用漢家之制封倫飾辨力言唐治之  
難異哉史遷明救僊之宜董子陳用忠之道約當世而

金史卷一百一十五  
卷一  
不悖載前書而可考方今欲一變周家之文弊則宜稍復于夏商迴狂瀾于既倒

以德為車賦

運啟元后天臨廣居握至權而負宸恢盛德以為車位  
正當陽式誕敷於利器術周御俗協順動於皇輿王者  
受命應時繼天立極以何道而諸侯順軌以何階而百  
官承式遵適治所由之路必有其資為積中不敗之車  
莫如以德粵若子育兆姓君臨九埏篤篤實輝光之有照

剛柔正直之無偏蹈中庸而美俗思簡易以承天動靜  
有節周旋罔愆敷自清躬爰顯懋昭之化行乎正道初  
無詭遇之權彼其合乎天地者是惟蓋軫之儀中乎規  
矩者厥有輪輿之旨文章藹旂常之制聲教協鸞和之  
美惟積誠以能然故安行而得以無反無側獨由仁義  
之塗不處不留遠襲帝王之軌豈不以據崇高之勢享  
盈成之基惟為之而行者我無失道則動罔不吉者物  
皆得宜凡此敦臨之術必資厚載之為虞舜升聞實由

行於本性唐堯光被示廣運於當時若乃當軸於上者  
皆咸有之臣鄰得與於下者有徧為之衆庶我乃肅禮  
貌以中立攬威權而外附由亨衢而出入動靡顛危總  
柔轡以馳驅行無遑遽其或外靡允修之實內乖攸好  
之心致遠分才非所及載重分力非所任曳輪弗濟亂  
轍相尋所以揚子著書智匪壘奔之用夏王有訓欽惟  
朽馭之臨異哉上奉皇天下臨赤子克謹日休之念斯  
盡時乘之理當今規模宏遠欲方駕於唐虞肯半途而

遂止

季秋大饗帝賦

以時當季秋天  
子饗帝為韻

君欲蒞祀禮宜順時惟是季秋之月允為大饗之期歲  
事告成爰屆備收之候天神可格式陳遍祭之儀稽記  
月之遺文見事神之至意既祭于郊兮著貴誠尚質之  
禮又為之饗兮申報本反始之義惟三代祀天之舉忠  
用夏正而比年旅帝之常屬當秋季斗既建戌辰俱集  
房寒初至而入室歲已登而築場舉帝籍之收歛入神

倉而蓋藏欲享于上斯時則當三務成功方授時於昧  
谷五精降德遂宗祀於明堂時厥明王類于上帝略問  
卜之末節舉用辛之定制席三重而緡禮具陳樂六變  
而高靈下濟候無射之良月肆歲多儀合太微之貴神  
爰稱盛祭蓋以歲遍者祀物成在秋百穀之要既舉五  
天之報宜修考以漢儀當後時於廟酎求諸唐典每寓  
禮於郊丘且夫御世而王事天猶子重其祀所以致欽  
崇之道謹其時所以明奉若之旨授衣既畢成民之義



斯存侑座俱尊嚴父之誠在此及乎簡編殘缺識緯流  
傳論不根於據古說多失於誣天時既弗正名因靡專  
感迎長啟螯之文禘郊亂矣立耀魄感生之目稱號紛  
然嗚呼降衷者其道至尊臨下而厥靈不爽有明德則  
可薦非克誠而莫饗上方儲精垂思以交神於布政之  
宮故曰惟聖人而能饗

古體詩

七夕

西風吹繁暑夜氣初宜秋所居稍虛豁得以消我憂獨  
眠堂中央一榻無衾裯開軒敞南北涼飈入脩脩是日  
七月七三星已西流殘雲不成雨縹緲當空浮雲行忽  
中斷月彩爛不收影落庭樹間枝葉如雕鏤草根有小  
蟲微吟作啾啾豈復厭喧聒更覺窗戶幽我欲終今夕  
飛蚊不相謀喧我復齧我驅去嗟無由但當我自屏豈  
與汝輩仇閉門歸下帷蝶夢尋莊周

雜詩四首

有憂烏啼門有喜鵲噪廬主人聞啼噪喜鵲唾老烏吉  
凶實由人烏鵲何與乎但知預相報其智各有餘人智  
不如鳥貪喜忌憂虞遂于烏鵲間憎愛乃爾殊福至自  
福至禍來貴先圖二鳥孰有益嗟哉主人愚

春蠶口吐絲生人皆仰供蜘蛛絲滿腹祇能打飛蟲衣  
服與網羅利害豈可同蠶生旬月老蜘蛛無春冬蠶食  
惟草木蜘蛛肉食豐蠶以繭自縛蜘蛛掛青空蜘蛛有  
餘毒春蠶有餘功受報乃如此天理不可窮

龜肉不可食蟹螯不中卜龜以穀自戕蟹以味見戕所  
養殊穀豹所亡等臧穀一足致患害內外皆鴆毒嵇康  
坐才死霍禹以勢族樂哉蟹螯中貯此老龜肉

江發岷山陽河出崑崙趾淵源既洪深浩浩并衆水東  
流至渤海曲折萬餘里經山無重數過郡不知幾海邊  
有小溪近出海山裏未能數里間已接潮波起到海雖  
則同難與江河比

書懷

羣山岸東海茲地真斗絕洪濤渺翻天朝夕吐日月雖  
同一宇宙迥與朝市別三山在咫尺芝草吾欲擷未能  
仙骨輕稍浣衷腸熱從我其誰歟乘桴曉當發

百年胡為哉萬事聊復爾功名早有意貧賤昔所恥歲  
月忽蹉跎少壯何足恃身外非我有毫髮不可致惟有  
一寸心俯仰要無愧歸去來山中高人未吾鄙

村居何所樂春至木欣欣夜睇海上月晝瞻嶺頭雲東  
家有勝士杖屨日相親山行共采蕨野步仍班荆初見

氣已合久游意彌真劇談復痛飲相對有餘情

海邊寂寞村春半芳菲月東風所至處陋境亦佳絕  
攏麥已翻芒山花自成列愁腸不堪斷預畏柳飛雪更憂  
鷓鴣鳴坐使衆芳歇白日不可留請試餐玉訣

### 山居

山居入長夏草樹遶我屋微風披拂之有聲來肅肅  
歲挺搖散影掩冉飄暗馥百合開數花孤芳更清淑  
我卧北窗下午枕睡方足挹此一襟涼冷然若堪掬  
坐使萬

慮空樂哉謝羈束有同顏氏子坐忘遺耳目又如慧可  
師安心得歸宿落日行庭前披衣自捫腹閒扶舊僵石  
細數新上竹小禽時下來相鳴入叢簇見我不驚飛人  
禽兩幽獨

登第後投魏侍郎

空山學仙子舊識安期生青霄許相接凡骨難為輕一  
朝行業滿九轉丹砂成安期忽東來從帝遊玉京下視  
一笑莞依然有餘情借我白雲車導以虹蜺旌攝身出

金少卿集卷一  
塵土隨君凌紫清機會倘一失千載何由丁

漢南晤魏侯彥誠魏侯贈詩期依韻和已而荆  
門受代歸鄉襄務冗甚未果荅既離襄陽舟中

追和

白頭有如新傾蓋或如故乃知意氣間投分自有處魏  
公使漢南風采聳一路凋殘濡膏澤冤訟廓氛霧游刃  
若發硎調琴不膠柱平生不相識見我國士遇杯盤倒  
箱篋笑語雜卮寓豈惟傾肺腑便可託嬰孺慰我疇昔



心何啻封萬戶離觴峴山曲握手惜歡聚江風吹行色  
短棹不得住臨歧亦何言加餐納多祜

道中寄丹丘親舊

別處日已遠別情轉綢繆行行千里餘脈脈無時休夜  
與夢相隨晝與淚俱流山高恨不斷水濶遮無由欲吞  
不下咽欲吐不出喉戟我胃肺間有如魚掛鈎尋端無  
從來了知在心頭翻疑一寸心能容如許愁平生丈夫  
氣愧此鬚髯虬朝來看蓬鬚滿鑑雪霜浮

上李文尚書

天孫司經緯專巧上帝旁星縷日月針幾經補蒼蒼弭  
節遊人間帝服無文章寒女一機素未知作衣裳再拜  
願祈巧精神通渺茫但恐雲車回虛無往路長

亭亭澗阿松冰雪何青青千歲已枯死流膏生茯苓雖  
無歲寒姿氣味猶典刑塵土久埋沒誰能驗仙經置君  
藥籠中儻可延年齡

蓬室有姝女顏色耀朝暉幽獨人未識嬋娟心自知高

堂懸寶鑑美醜良不欺借君一寸光為妾照蛾眉念當  
有所適辭親結羅衣常恐妾命薄失身輕薄兒安得嫵  
婉人白頭同所歸

魏彥誠見示出守廣德朝士送行詩用韻追賦  
肅肅松柏姿春月慚蒲柳但看霜雪後何者能不朽君  
昔辭鴛鸞出為小邦守治行達明聽眷知從此厚至今  
兩郡碑德政刊瓊玖九醞熟雖遲要成宗廟酒

食橄欖有感

余初食橄欖眉蹙口欲吐稍稍滋味之久乃見媚無曲  
終喜奏雅先病得後愈功成老大時亦足酬嘏咀余生  
足憂患備已嘗險阻猶如夢中蟲自習夢中苦不知苦  
盡處回味有幾許古人倒啖蔗佳境貴漸取但問有與  
無遲暮不猶愈君看道傍李棄置終泥土

書白氏長慶集

我愛樂天文平易更精切筆端應有口心事無不說游  
戲供日用工巧疑天設述情恣毫釐辯理窮曲折如我

本欲言挽我開齒頰如人病瘖啞  
代我傳喉舌駕駘擬舉步駿足過  
如瞽弱孤未及彎彊弩已穿札撫才  
初自愧適意還深愜讀盡一編詩胃  
懷消百結

移竹

借宅開小軒自移一叢竹悠然北窗  
下意色都不俗晴影終日幽風聲杪  
秋肅最憐疎雨過會有白雲宿深培  
畏不壽靜對殊未足主人已虛心坐  
客亦青目四村多修篁玉立森如束  
不為人所愛况復困斤斲天安奚優

劣地遠懸榮辱物情豈固然世事同一躅何當尋怪石  
小壘傍寒綠要收山林趣密置軒檻曲西峰謾多奇吾  
方倦遐矚

吳傳朋遊絲書

鳥迹既茫昧文字幾變更達者擅所長各就一世名衆  
體森大備造化無留情獨此遊絲法千古祕未呈右軍  
露消息筆墨無成形偉哉延陵老三紀常研精絕藝本  
天得非假學力成應手快揮灑援毫謝經營奮迅風雨

疾飄浮鬼神驚風狂蛛網轉春老蠶咽明直如朱弦急  
曲若卷髮紫飛梭遞往復折藕分縱橫獨繭綠不斷風  
鳶騰更輕希微破餘地妙絕無容聲飛白笑冗長堆墨  
慚彭亨可憐太纖瘦不受鐫瑤瓊咨爾百代後若為求  
典刑

病後戲贈同官蔣子權

吾衰謬養生任運常坦坦每嬰相如病漸作叔夜嬾昨  
因觸大暑留熱在鬲脫醫師戒飲酒所嗜不可斷寒熱

一朝作水火互濯燬地偏無藥餌伏枕但憂悵同僚有  
蔣子奕俊流輩罕作詩宗徐庾巧語如繡纂間有少陵  
風醇音調玉琯豈惟詩家秀從政今可算牢盆有出納  
曉夕親授莞琴瑟費更張君能時急緩公餘治方書今  
昔多所繼有來謁疾病手自施湯散買藥輟俸錢為民  
已痼瘡我昨病在床君來問尤欸教我煮橘皮湯熱過  
冰盃繼送桔梗湯一杯去煩懣柴胡作引子汗出如被  
趙所投立有效病去若水浣乃知才藝多所蓄非窾窾



又聞善騎射長箭必引滿設侯六十步所發無虛斡觀  
君精悍姿此語不其亶獨於圍碁低尺固有所短向來  
屢小勝喜氣輒衍衍我欲張以羸不令見矛積侈心益  
驕汰出語頗夸誕不知小敵堅一敗石破卵大戰決雌  
雄遲君落新館

贈范覺民

范子廊廟器至寶非凡璞胷懷吞雲夢豪氣低華嶽昔  
在童稚時樹立已卓卓曳裾橋門內嶄然見頭角歲行

在辛丑帝策詢民瘼造庭百千人衣帶矜褒博平居議  
執政至此舌為枯獨餘子范子雅志不可奪吐辭如湧  
泉一發孰能遏揮毫不停綴盈卷無點抹漢廷執戟郎  
環顧皆錯莫縱橫五千字字字醫國藥期於必伐病非  
徒事迂濶怪言一驚衆士論歎且愕皆云布衣流志在  
縻好爵乃爾張危言身謀胡太錯當時羣宗匠其間多  
齷齪指言為沽直欲使趨鼎鑊堂堂春官臣主張獨何  
確謹議既冰釋衆口不能鑠乙科忽大闡秋天一鵬鶚

傳誦爭取先紙價為翔躍聲華頓輝赫藹然暨南朔憶  
昔客東都猥廁英遊數每於談笑間論議聞謬誦語  
非沽名生平真所樂乖離三四載遣我情懷惡間者見  
眉宇颯然意氣豁亟使羅酒漿沈沈動清酌秉燭夜相  
對談詞恣嘲謔公卿頗歷詆治亂亦商略間出新詩篇  
清製皆灑落祇懷蒼生憂肯為窮愁作少陵不忘主氣  
味若相若倘使任言責必有裨帷幄奈何諫諍姿久矣  
滯丘壑似聞廟堂上知已被新渥一公丞烏臺一公相

黃閣吾君皆太平二公繫深託薦賢乃報國看子翔寥廓

送黃叔愚赴平江教授

人生水中萍泛泛隨波瀾偶然成聚散誰使為悲歡伊  
余從君游兩見歲履端相得恨不早相見常若難今又  
舍我去覺我肝腸酸君誠湖海士豪氣老不剋劇談憤  
世俗怒髮時衝冠向來對宣室見晚帝興歎落落不苟  
合棲遲猶冷官高才徒白首未許陪鴛鴦蘇臺今輔郡

舉頭見長安會看有追詔祝君且加餐吾衰釣滄溟羊  
裘侶魚龜逍遙各有適快覩扶搖搏尺書倘見存慰此  
離憂寬

初至鴻祐成二百字

我生何悠悠飄搖若懸旌已破龍華夢復成鴻祐行鴻  
祐在何許海濶山崢嶸地侵魚龍窟路與猿猱爭曉日  
見初出潮波無時平我來秋薄暮寒雨紛縱橫狂飈振  
林麓窓戶皆有聲山鬼夜中號怪禽籬外鳴我衰不能

寐起行遲天明歛然念身世百感襟抱盈仲宣昔遭亂  
避地之蠻荆登樓賦懷土悽傷欲無生況我滯甌越八  
見秋風驚憧憧一州間蕭寺六易名余至丹丘常寓僧舍今六徙矣已  
去還復來如魚被鉤嬰去既無所之來亦何所營藜藿  
誠不充萍蓬甘所丁茲地實樂土浮生聊耦耕鵲原喜  
在眼蠹簡能娛情九夷亦何陋四海皆弟兄

舟至都昌初見廬阜連日陰雨忽爾晚晴雲氣  
頓收巖巒盡出截然蒼翠立乎巨浸之中真天

下之奇觀也遙望欣然酌酒賦詩

久思廬山遊忽至左蠡曲倚船初一望秀色溢我目百  
里堆翠黛千峰矗寒玉陰雲知我來收歛入山腹須臾  
變光景盡出一山綠宛如几案間青銅鑄巖谷又如牆  
壁上古畫挂圖軸水光晚蒼茫風氣秋肅穆明朝南康  
峴艤棹陟山麓歡喜不自持一杯醉醺醺

和許總卿

孔明屢出師常苦糧食少公今主邊計積粟丘阜小卧

龍志空大流馬功竟杳當時若得公大事指顧了

從來方面貴體尊吟詠少君侯七尺軀詩膽看更小句  
如星斗爛氣與雲天杳詞源倒三江傾瀉何時了

我登峨嵋山偉觀天下少觀公驚俗句更覺眉山小短  
章鋒斬絕大篇氣深杳紙敝墨色渝讀誦不能了

贈襄陽帥吳彥猷

令威千歲歸城郭尚如故我今還故鄉陵谷亦易處荆  
榛荒舊蹊溪壑改新路城中十萬家碧瓦生煙霧茅茨



變閭閻舊屋無一柱相逢訪親舊十百不一遇豈無新  
人民往往皆旅寓元帥念疲瘵撫養若稚孺近聞田里  
間稍稍復逃戶會當一二年功效見生聚但恐鋒車來  
追詔不容住努力慰斯民望公若羊祜

出疆次副使淮陰舟行

丁年慕請纓白首翻攘袂輶軒遽憑軾魏闕頻回睇兩  
淮輕戰爭萬物皆憔悴雲繁雪霰舞風猛波濤沸椎凌  
僅通航鼓夜無停柁依檣聞喜鵲酌竿烹鮮鱖出塞那

復古涉川今已利一節誰與持同舟心靡異奮身徇主  
憂圖國忘私計昌黎去懷妾定遠老思妹高情獨無戚  
慧眼不留翳豈惟詩酒豪抑亦文武備開館昔登瀛奉  
車元起沛君遭功名迫我堪閒散置他年洛下吟憶君  
徒擁鼻

投座主張子猷給事

東風入雕檻百卉無不花一經造化手各若矜春華主  
人最好事護養從萌芽澆灌與封植恩光無等差其間

一本尤所喜欲售千金貴無比君不見洛陽好事丞相  
家曾剪姚黃貢天子

送賈可封隨郭帥還西城三十韻

峴山之陽漢江浦黃花九月迷村塢故人船上初識君  
白酒黃鷄對樽俎坐中意氣最相親便許論交輸肺腑  
君時方壯我尚少杯酒相逢各豪舉欲傾滄海入壺觴  
不覺風雲先笑語煙塵回首暗鄉縣避地偷生兩羈旅  
西城邂逅正春風南鄭流離共秋暑扁舟東下一沾巾

漢陰渡頭天欲雨君留蜀漢我甌越關塞悠悠路修阻  
每悔昔日但酸辛欲寄好音誰付與日邊失喜雙眼明  
一笑恍然相勞苦久經喪亂喜彊健語及艱難更悽楚  
離合悲歡二十載往事傷心那可數酒後清狂不復能  
鬢邊白髮今如許向來驥子未總角今與爺長秀而無  
父學嶄然已老成吾徒之衰固其所君材磊磊多大略  
胷次縱橫雜文武當年上疏請長纓欲以忠信為干櫓  
馳驅慷慨感知己十年上佐留邊圉一從捧檄傍紅蓮

幾為臨戎揮白羽元戎入覲載輜車策勲進秩光賓主  
王卿合作水衡丞庾杲復入將軍府胡為側翅尚隨人  
千里長城賴裨補汾陽僚吏多將相家聲盛事今猶古  
致身富貴真未晚唾手功名不難取豈惟出幕看旌麾  
曾是封侯裂茅土炎歊六月三吳路海氣昏昏暗天宇  
驪駒已駕不可留憂緒中來密如組亦如遠送終別離  
只有加餐相贈處雙魚莫厭遠書頻從此西風日傾佇  
次韻陳庭藻赴天中燕詩二首

紹興聖主垂衣裳倬然文治昭天章已聞華封祝堯帝  
豈但畏壘歌庚桑千秋此日紀佳節萬歲羣臣稱壽觴  
簾前宮扇交翡翠仗下寶馬屯飛黃昭容引儀近日月  
御史執法嚴風霜九賓無譁臚句肅劔佩儼雅趨侯王  
一聲鳴蹕傳朱輦千官賜宴趨文昌湛露尊壘均渥澤  
薰風絃管迂休祥浩唱充庭雲不動繁花壓帽春風光  
可憐歡聲正四合不覺暮色來蒼蒼軒騶散去九衢閑  
朝衣醉漑餘淋浪小臣病著不能起但聽廣樂風聲長

天申上壽開明堂羣公祝聖多新章不論南山成帶礪  
要看東海生禾桑君恩中臺燕百辟金罍兕觥雕玉觴  
飯抄香粳雲子白酒瀉法釀鵝兒黃宮衣拜賜近端午  
輕疊香羅如雪霜功臣影甲奉朝請貂冠戔戔來異王  
中興盛事須記述樂府宜得張文昌感寓諸孫今列宿  
詩鳴省戶為時祥每逢朝家有慶瑞輒以篇詠賡休光  
腐儒白首謬通籍博士一經慚后蒼敢陪詩人論風雅  
祇與漁父歌滄浪昇平頌聲還大手白傅才力兼諸長

詞源圖

著作之廳屏十幅怪石滄江莽相束恍然坐我三峽旁  
洶洶奔流欲頽屋不知狂瀾何處回壯哉萬頃納一杯  
自從此畫出名手海潮不復聲如雷一時文士羅東觀  
波濤入筆驅河漢逍遙捫腹日來看更得丹青助揮翰  
我本儒中山澤癯烟蓑祇合老江湖煩將一段好東絹  
畫箇漁舟釣雪圖

王鈇轄出示乃祖兩令公畫像求詩為賦長句



藝祖開基登九五駕馭羣雄走龍虎五十餘年到章聖  
將帥名臣猶接武王家再世蒙休光父子繼踵仍騰驤  
我從諸孫見畫像絕世風骨何堂堂隋國令公溫如玉  
方口豐頤秀眉目典刑猶在想可知骨肉都勻肥不俗  
小令公為隋國兒比之乃父加瓌奇凜然滿面英豪氣  
猶有酣戰驍雄姿百年神雋今已矣貌向丹青尚如此  
虎頭不用著三毫燕頤須教飛萬里屹然立向廟堂間  
可使邊人毛骨寒千載長存麒麟閣當年肯著駿驕冠

人物于今寧復有奇麗誰是功名手  
麀頭鼠目休求官  
歸作山中耦耕叟

登大嵯絕頂觀圓相佛光成長句二十韻

峨眉峻極西南著萬景莊嚴諸佛具  
高標天柱八紘張  
雄鎮坤維百靈赴  
我來雨霽羣峯出  
正值春暄三月暮  
上方解凍僧入巖  
遠俗來遊客填路  
籃輿牽挽六十里  
梯棧高低三萬步  
魚貫攀緣筋力疲  
鳥騰陡絕神魂懼  
行經崖坂幾縈曲  
望極堪輿莽回互  
錦里遙看井底迷

雪山忽認屏間誤幽巖得照石發彩陰洞有聲雷蓄怒  
楞伽仙音好鳥語梵羅綿界神龍護滄海潮回波浪平  
藍田日暖煙霏布長虹欵放白毫光淡墨俄瞻紫金聚  
應真飛錫衆共覩圓相攝身人自顧六牙白象恍當空  
三足赤烏潛隱霧琉璃瓶瑩秋月白優曇花淨含曉露  
瑞境旁連瓦屋起合成一界如相附神燈夜從九頂朝  
散作千山無盡炷肉眼親觀佛會開凡軀恐逐仙風驚  
欲尋傳說箕尾間休訪君平斗牛度便排闥闔陟高圓

擾擾人寰何足寓

次制帥所和前韻

聖主憂勤躬萬務英豪寧許山林住弓旌號召士無留  
竹帛功名公所赴天表對揚咨見晚坤維鎮撫歌來暮  
雪山增重絕氛埃蜀道非難履平路分陝聊煩攄妙略  
秉鈞已歎迂高步朱轡撫俗遠民懷玉帳折衝荒服懼  
羽檄不飛烽堠滅駿骨多收邊市互孔明七縱詎非長  
戶牖六奇真不誤農狎其野無外憂馬騰于槽有餘怒

三陟絕徼皆妥安諸將雄師今盡護九重益友思直諒  
四蜀新聲詠宣布帥閫方觀勲業成廟堂行看精神聚  
嗟我衰遲託末契辱公敦篤傾殊顧當年獻賦誦凌雲  
上國承顏悅披霧禹門親覩躍風雷堯陛初驚承雨露  
龍顏下矚頓生光鳳翼高翔從此附稱身朝服曳青雲  
滿袖天香攜寶炷九霄變化冥鵬升一紀光陰隙駒驚  
綈袍雅意念張祿襦袴餘波依叔度他時入覲對金蓮  
伴直應隨玉堂寓

再和

年將六帙諸衰具漏盡鐘鳴行不住一身許國銖兩輕  
萬里攜家斗升赴五羊大夫習勞苦三鱸先生嗟晚暮  
分為一世數奇人踏遍九州多半路早歲嘗為梁甫吟  
中途已失邯鄲步窮通有命常自樂

莊子窮亦樂通亦樂所樂非窮通

幽顯無慚方不懼

郭象注莊子云幽顯無愧於心然後能獨行而不懼

每讀商書

戒十愆不憂漢法干三互奔走頻驚使節光叨逾敢歎  
儒冠誤車下奪牛任客疑水中見蟹從人怒恐恩肯效

兒女語正直猶希鬼神護平生事業在方策將老精神  
敝泉布九重德意日邊遠十萬師徒關外聚不令聖澤  
皆下霑寧免吾皇尚西顧上為朝廷廣霖雨下令郡邑  
清蒙霧乘輶無術漫觀風分陝維賢倚行露青天雲霧  
昔曾披綠水芙蓉今密附郊垌小隊連後乘燕寢清香  
同妙炷鳥雀難偕鴻鵠飛駕駘暫逐驂騑鴛自憐落落  
王平子遇此汪汪黃叔度但憂溫詔趣公歸蔭宇不容  
孤迹寓

再和

珠璣百斛何人付公有詩筒來不住出塵秀句若霞摛  
走筆豪篇逾響赴吟安一字不知老朝作千篇猶未暮  
秋天鴻鵠翥浮雲平地驂騑驅熟路分憂制節綿萬里  
餘事文章兼七步千軍獨掃人共驚八面俱來我何懼  
力扛九鼎更妥帖胷蟠萬卷森差互千言未困見縱橫  
一點不加無謬誤音諧律呂鳳凰鳴勢薄雲天鵬鳥怒  
流傳應有賈客售在處豈無神物護公詩光焰千丈錦



我詩麓窘一尺布公詩雄富百雉都我詩窮陋三家聚  
行經北海恍自失出見西施羞反顧殘膏祇欲借鄰光  
餘潤有如蒙曉霧君侯雅志和薰風聖主恩光深湛露  
事業終期白日懸功名已見青雲附願公歸侍玉皇案  
天香復與金童炷願公西取王母環雲車直指瑤池驚  
要當都俞廟堂上豈久淹留井參度顧我塵埃不足論  
屈曲世間隨所寓

許總卿見和再用韻

四紀才名淹世務七年符節坤維住褒功屢有璽書來  
趨詔尚遲軺傳赴男兒功多投老遂烈士心豈隨年暮  
松杉頂禿始干雲駿馭齒長方識路所臨遺迹紀蕭規  
相繼小巫窺禹步補公舊處信有幸顧我非才深自懼  
轉粟飛芻驅蜀阪摘山市馬司邊互伐柯執斧固非難  
依樣畫葫終少誤解牛毋歎妙肯綮養虎尤工時喜怒  
駭北三千歸圉師貔貅十萬安都護公家遺利悉桑孔  
聞將歡心收戍布關信增屯烽燧遠邊儲入粟舟車聚

未歸左右展論思端為西南重憂顧漠北齊盟尋繳日  
斗間王氣纏非霧坐鎮全消玉塞塵召還應及金莖露  
佳句忽貽韶濩作正音乃許巴渝附晝哦蔬飯費三吐  
夜誦葦燈殘一炷欲隨驥尾彊爭馳暨到蟻封難並鶩  
囊收甚謹加十襲筆舉復停知幾度試將風格比唐人  
堪與拾遺參感寓

劉侍郎見和再用韻

大方廣佛三身具境號華嚴普賢住三千淨土毛孔吞

百億化身塵刹赴底事眉山迹偏顯端由象法時將暮  
三乘不起正信心一線頓開方便路將欲神變驚凡目  
故歛光芒歸窘步示現雖同人異見開遮未判誰無懼  
臂力遙擎妙喜來頂光近攝清涼互我來親睹未曾有  
方雷傳聞元不誤陽春正值風日好陰雨不逢雷電怒  
入夢惟憂神鬼知乘危暗有龍天護招提問路方上征  
世界當空已先布千林寂歷鳥聲少萬嶺奔騰雲氣聚  
高峰初到甫休歇圓相俄驚成指顧一壺恍入物外天

五里知非世間霧感通咫尺捷影響變滅須臾嗟電露  
公居福地寶巖對身享耆年仙籍附兩禁高辭法從班  
一燈久續禪宗炷正始餘風獨後凋建安逸駕爭先驚  
忽聆酬唱便隨喜要與見聞俱得度願公且見宰官身  
一宅常與軒冕寓

和人元夕

長安百尺朱樓高傳籌夜醉聞鷄號金吾弛禁玉漏永  
九衢遍走狂歡遨訪尋三曲選清唱交結五陵皆大豪

笑將千金買斗酒輕若九牛亡一毛賦詩更作文字飲  
止酒一篇羞和陶筆端百韻鬪奇險坐上幾人推俊髦  
萬事轉頭成短夢十年屈指如奔濤祇今衰老但悲感  
長歌終日彈豪曹

和關子東鐵尺歌

先生平生無俗嗜博取珍奇自娛戲案間雙尺本蛟龍  
怪底雄雌俱出地含精古鐵色沈沈質白玉兮價黃金  
有時風雨暗堂室直恐雷電相搜尋淨業知君專筆硯

白首殘編天眼見一朝出此瑞文房神物化成非鍛鍊  
閱遍千人誰得將主人比德端且方永供黃卷鎮邊幅  
明窗淨几生輝光先生歌成驚傑句助發鏗鏘得君故  
何人似與郭代公寶劒豪篇不須賦

--	--	--	--	--	--	--	--



欽定四庫全書

漢濱集卷二

宋 王之望 撰

近體詩

乙巳四月自都下省歐陽氏姊於封丘時河朔  
流移滿道即事有作寄范覺民

北出都門道紅塵汚客襟  
號蟬如有意高柳自成陰  
轍亂思良馬林幽慕逸禽  
據鞍回首處愈覺帝閭深

龍華山寺寓居十首

抱病雲山遠興懷節物新  
林紅紛過雨嶺翠鬱堆春  
猿鳥時相狎烟霞日自親  
可憐成底事半世走風塵

齋飯來香積鐘聲出翠筠  
僧投松逕遠鳥下石壇馴  
茶摘春山嫩泉烹雨澗新  
蕭然烟篆室處處喜留人

嗜好非前日顛狂減少年  
久疎長夜飲新學小乘禪  
覓句驅春恨翻書引晝眠  
朝來山鳥鬧驚破睡中天

作客他鄉久宜人此界稀  
身閒長挾策地僻慣披衣  
妻有蘓鹽樂兒因荀蕨肥  
出門何所適終日掩荆扉

海國幽棲地春風欲暮時病憂梅雨逼貧歎麥秋遲併  
日終無愧逢年會有期飢寒寧苟免吾道諱磷緇

時節清明過溪山晴霽初出遊偕婦子相識半樵漁稼  
穡歸寧遂經綸計已疎淵明至窮約三徑亦吾廬

羊乳莖猶嫩

枸杞也

豬牙葉未殘

皂莢也

呼童聊小摘為爾

得加餐仗馬卑三品山雌慕一簞朝來食指動苦菜入  
春盤

有客過松逕呼兒下竹關張燈深夜語沽酒遠村還醇

異交公瑾清非醉景山劇談自有理不在濁醪間  
杜宇來何處天涯又復鳴空山聽更激寒夜窈難明故  
國三千里春風第一聲年年羈旅地愁絕不勝情  
水鄉經月雨潮海暮春天芒種嗟無日來年失有年人  
多逢菜色村或斷炊烟誰謂山中樂憂來百慮煎

送別祝得之

倦游淹海上得子意彌敦文采與春秀性情如玉溫相  
從不知久欲別更何言努力功名會飛騰入帝閭

別友人

此日天涯別春風斷客魂  
綠楊初暗路芳草欲迷村  
祖帳前山遠驪歌落日昏  
相思今夜月不復對清樽

豁然亭

何處開軒檻凌虛杳靄間  
胷中吞百粵眼界抵三山  
曉日賓滄海秋潮俯碧灣  
登臨一舒嘯宇宙頓寬閒

同諸鄉人泛臨安西湖

短棹夷猶處湖平酒滿觴  
荷深迷去路波淺澀歸航  
落

日山頭暗西風水面涼今朝知己共相對恍江鄉

坐中贈朱尉慶長

君尉襄陽日吾方首善游素交微半面青顏乃雙眸有  
喜一尊共相期三徑幽溪山許分老為我繕菟裘

懷李相之

李子通家舊人門孰與侔胷中足今古皮裏貯陽秋尊  
酒懷清致關山隔俊游江城攜手地春色黯離憂

相之見和有真能乘興之句再次韻

一月如三歲懷君未足侔情親頻入夢句好欲生秋真有山陰興聊尋河表游翻愁江上別心事不堪憂

齊堯佐寄詩許予授代歸穀城日相過次韻

故人千里去猶記別時歌衰鬢禁愁得狂懷可奈何南枝春意動西望夕陽多三徑荒涼外高軒詎肯過

和李士舉陪提刑徽猷遊中梁山臨秀遠軒以望江中平陸之勝承示佳句且叙故舊離合之感次韻二首

空翠浮軒檻嵐光拂棟梁江隨平野曲林擁暮山蒼城  
郭猶平日田疇本樂鄉呻吟未休息衰病意空長

京口追遊地錢塘執別年飄流恍如夢聚散豈其天夙  
駕行趨詔當朝正急賢紫荷持從橐去去入林泉

次韻賀子忱春事

老境流年速春風幾日晴清尊花下怯白髮鏡中明  
蝶迷幽夢倉庚愧好聲良辰一尊酒鍾鼎可忘情

挽林給事中母柳夫人詞三首



聯德成偕老和鳴六十春  
休聲傳孝婦餘慶產名臣  
人去虛韋慢哀深泣孟鄰  
千年憑直筆圖史播芳塵

作配歸華族生賢瑞國朝  
升堂拜王導窺牖識房喬  
綵服金龜重安輿駟馬驕  
慶門今鼎盛環珮忽蕭蕭

方喜門施戟俄驚客奠芻  
孤鸞空對影老鳳獨將雛  
祖送傾朝士哀榮震帝都  
祇應歸葬處千兩擁山隅

張和公母秦國太夫人輓詞

誓比共姜早貧如翟母希  
三遷功可大五福報無違  
哀

繡供兒絲風旂契祖機千秋憑直筆圖史播芳徽

贈元觀正字

才名四紀藹簪紳王謝風流信絕倫雲路舊遊羣玉府  
山城初見謫仙人八龍漂泊知餘幾三爵追隨莫厭頻  
此會未應輕作別梅花且醉臘前春

和魯丈贈光化令趙元質

奔波朝士覓官忙獨買扁舟去意長汲黯舊聞羞作令  
馮唐今愧老為郎鴈鴻引去知何慕鷗鷺歸來不亂行竊

食端輸廁中鼠驚餘猶得飽飢腸

關子東約中秋遊天竺再用前韻有詩和之

湖光盡處兩山開夾道蒼松鬱壯哉水過冷泉雙澗合  
石飛天竺一峯來勝游喜有幽人約佳句俄催爽氣回  
桂子中秋正芬馥流霞好泛月邊杯

文監丞出關子東西湖春遊倡和且約為重九  
之遊次韻

西湖爛醉踏青天秀句重尋未隔年已約清樽携九日

要將黃菊薦三賢深秋風日明寒水宿雨波瀾起畫船  
佳氣蔥蘢如有待曉粧濃淡抹非烟

題龍華寺

孤枕僧庵夢不成披衣推戶竹軒明一天月色連秋色  
萬樹風聲似水聲小檻沉沉青嶂合脩簷冉冉白雲行  
今宵佇立情何限曉鑑霜毛兩鬢生

同年十人會於湖上巫子先拘臺制不來有詩

次韻

曲江一散各西東  
杯酒重來氣尚雄  
才薄愧參龍虎榜  
會難常歎馬牛風  
弟兄半已顛毛白  
賓主休辭醉頰紅  
底事坐中猶未樂  
車公不遂一尊同

與同舍遊淨明是日大寒予獨乘馬諸公以孟  
浩然相戲以其鄉人故也關丈有詩次韻

慘淡陰風暗廣川  
衝寒直到白雲邊  
寒驢苦憶長安道

古寺深行小有天

淨明有邊郎中詩云疎篁蔥蒨雲添潤亂石玲瓏蘚借斑小有洞從仇穴

入妙峯頂對德雲  
峴首詩人窮入畫  
孤山處士句堪傳  
閒同行者皆愛之

疑君便是林君復妙字清題故宛然

淨明有子東詩  
子東臨安人也

丈人觀設醮留題

翠麓丹崖敞洞天瓊宮珠殿照雲烟  
森羅壁繪推前輩縹緲樓居見列仙  
朝斗壇邊星象冷步虛聲內月華圓  
塵埃迴隔人間世骨悚魂清夜不眠

再用前二詩韻

洞府仙扃本不關凡蹤長墮世塵間  
勝遊得得今須徧俗駕遲遲肯遽還  
絕巘晨光收雨脚羣峯春色繱烟鬟

感通珍重神靈意詩思雖荒詎敢慳

勝境名標第五天殊庭佳氣藹非烟鼓鐘與看千人會  
玉石難分十種仙幽壑舊傳靈藥富蒼崖曾現寶光圓  
塵勞未決丹梯急只得虛堂一夜眠

棲賢三峽橋次南康守晏德基韻

古寺深藏紫翠間清風夾道凜蒼官千尋秋色巖巒淨  
十里雷聲澗谷寒此去洗心應少累從來蓄眼未經看  
使君健筆題佳句一首新詩倒醉瀾

題胥解元成美堂

當年英妙曳青衿曾習王褒盛德吟騷騷作駒期萬里  
鸞凰振翼便千尋馳聲場屋誰勗敵好事侯邦盡賞音  
古語美成須在久願君長保歲寒心

贈元運使

使節東來炯繡衣蒙泉景色動旌旗官曹傳檄清風肅  
老稚隨車淑氣移趙日可能兼畏愛蘇天那復間公私  
鵠原更遇蓬瀛客好駐幃帷十日期



缺題

霜晴愛日曉生東  
蕭寺山茶賞歲豐  
錦里出遊驅小隊

雪山納堠狎諸戎  
葉連油幕侵天碧

山茶兩株頗高大

花倚朱

旗特地紅美景良辰萬人喜不妨行樂一尊同

還鮮于蹈夫詩編

百首新詩句句妍  
追還江左一千年  
春歸池草難專美  
冷入江楓稱所傳  
一字人知吟不到  
八分我喜錄成編  
西來所得真多矣  
滿篋今藏錦繡篇

溫原廟神御北還和謝景思韻

靈輿歸路肅班班  
帳殿秋風響珮環  
九廟向來連北闕  
五陵依舊對南山  
玉衣不受清塵浣  
風馬應隨綠仗還  
行起奉常陪薦享  
天威咫尺侍懸間

賀劉侍郎三首

早歲儒林俊譽流  
中年持橐侍宸遊  
論思清禁三朝遇  
閒散殊庭二紀投  
迹與香山齊出處  
詩將彭澤盡賡酬  
似聞璧水求三老  
行起蒲輪慰九州

漢嘉平日想風流喜作凌雲載酒遊塵土何時公事了  
林泉聊與故人投心期濟物衰難彊志在求田老未酬  
官滿便當投劾去一航從此下揚州

萬景樓頭盡日留烏尤巔上及春遊谿潭杳渺游魚樂  
林木陰森倦鳥投千尺梵身名不謬半輪山月句難酬  
爭流競秀君休問更有江聲撼一州

題上清宮

一徑緣雲徹上臺玉樓銀闕冠崔嵬連峯袞袞從天下

迴野茫茫匝地開  
曉日重溟紅浪湧  
夜燈千嶺瑞光來  
却歸下土人應怪  
身自瑤池閬苑回

留題修覺山絕勝亭

余昔於峴首壁間見一蜀中監司題字云  
景物似新津之修覺  
今登絕勝亭徘徊久之  
亭似恨偏江似恨小  
而雜平遠似恨不甚  
廣轉至寺三門西望  
邛江頗濶眼界益寬  
蓋庶幾焉因題五十六字

古寺幽巖萬木稠蜀川一覽盡西州  
依微遠樹低平野散漫清江吐亂洲  
老眼乍明疑峴首歸心忽動憶槎頭  
當年風物悲游子子美應同故國愁

風物悲游子子美詩也子美亦襄陽

人豈其有所感耶

### 題廣利院

翠嶺蒼巖帶落霞水雲平野一川斜  
二山相距無千里數口俱仙有兩家  
仇穴便當營草屋武陵何必訪桃花  
擇鄉試復詢風俗善政人人令尹誇

寄題謝景思藥寮仍用其韻

城府年來怪迹疎，端因藥圃滯巾車。  
芒鞋入谷親尋種，野服巡欄自把鋤。  
室藹芝蘭無俗物，房深花木稱僧居。  
他時猿鶴休驚怨，安石寧終老一墟。

同鮮于蹈夫管養正飲衛氏雲亭

誰結危亭古岸頭，雲容水態入簾鉤。  
數峯嵐翠欲排闥，半夜溪聲碍枕流。  
坐烟霞終日秀，對牀風雨一燈幽。  
那知戎馬紛紜際，杖屨相陪得勝遊。

同龐彥才晚酌於涵翠軒

登臨到處久徘徊  
水色山光滾滾來  
百頃烟村抱城郭  
數峯雲水擁樓臺  
千篇取足詩材賸  
萬軸橫陳畫筍開  
清興窮探猶未厭  
更投涵翠舉餘杯

上曾二丈仲成

湖海元龍氣尚豪  
笑談誰料已霜毛  
文章家法西京在  
兄弟才名北斗高  
欲取功名酬老大  
豈將州縣歎徒勞  
登壇不獨風騷將  
出幕他年看節旄

憶拜冰壺日下時先君未老我方兒庭闈一闕成今昔  
世路重來太險巖風義肯忘三益友姓名願入八哀詩  
遺孤么麼何能報泉下幽魂儻有知

患難餘生二十年一身孤苦百憂纏文章昔謂古可到  
蹤跡今為人所憐憔悴形容勲業鏡歸依空寂祖師禪  
不孤雖有山公在恐逐龍舒下九泉

和關子東筇杖

老境生涯正倚君周旋夷險共悲欣最憐磊磊多高節



未肯斑斑出異文  
漢閣燈來徒照夜  
葛陂龍去謾拏雲  
願為靈壽扶黃髮  
廊廟他年看勒勲

落梅

春意枝間忽暗驚  
乘風作陣去縱橫  
蒼苔可忍欺香骨  
粉蝶無端亂舞英  
有恨應羞霜月照  
鍾情猶賴晚風輕  
夢回一夜頻搔首  
腸斷空階驟雨聲

香殘粉暗若為情  
寂寞空餘瘦影橫  
雨後園林無玉樹  
朝來庭院滿瓊英  
浮雲冉冉當風盡  
飛雪飄飄落砌輕

廣武為君聊一歎羣花從此擅名聲

挽李通判

六藝潛心老益尊此邦耆舊衆推賢  
高文早出諸儒右清節宜書獨行篇  
白首可憐纔半刺朱衣猶得貴重泉  
佳城一閔成千古寂寞哀笳慘暮烟

挽王教授子節父

絲衣方喜奉安輿丹旄俄驚返故居  
已作善人稱里閭固宜陰德大門閤  
悟超庭柏心無礙香茁階蘭慶有餘

哀挽一聲寒日外蕭蕭風樹鎖郊墟

題蒙泉

西北峩峩疊嶂來濤奔浪湧勢難回忽臨城郭千峰住

下有源泉萬斛開魚鼈寧容腥沼沚

池素無魚

蛟龍曾是起

風雷平時寂寞何靈響歲旱方知濟物才

禱雨輒應

和友人

弟兄南渡各馳驅幾奉君王尺一除黃耳音書寄懷抱  
烏衣門巷惜丘墟澄清孟博榮持節雅量玄平靜著書

五桂家風殊未艾  
黃山佳氣藹如初

坐閱江城歲月遷  
心勞政拙豈能賢  
昔遊泉石迷尋訪  
故里風烟喜接連  
聊假頒宣行素學  
敢將遲暮歎華顛  
他年良史徵佳什  
會入西京循吏篇

和眉守王郎中

驚風鴻鵠各翻飛  
同落西南蜀一維  
一日三秋雙鬢改  
兩鄉千里寸心馳  
清香燕寢多佳致  
遠景樓臺發妙詞  
只恐江山留不得  
賜環間已下丹墀

壽台州黃守

千載初平慶未窮  
本支今復見仙翁  
當年部鼎爭尤力  
此日于門報已隆  
政尚寬和承祖烈  
量涵清濁稱家風  
賜金增秩知非晚  
行看絲綸下禁中

壽處州徐守三首

僕射文章六百春  
人間又見石麒麟  
朱顏白髮古仙伯  
和氣清風今德人  
出處三朝常守道  
承宣千里更宜民  
聖時共政須耆舊  
歸去千秋輔紫宸

共理經年惠利豐此邦歌頌藹提封仙都洞府春風好  
處士星躔瑞氣濃道向偃佺傳口訣禪從摩詰悟心宗  
世間功業公餘事平日高情薄萬鍾

赤矢朱弓祖慶綿五雲吉夢世生賢嘉時浹日迎重九  
景運中天恰半千律播金商資爽氣露和瓊屑引遐年  
壽觴莫負專城貴好對西風醉管絃

留題光相寺

至人悲念攝冥頑倏見光明指顧間億劫未曾親見佛

一宵今得暫棲山從來業障須除結此去功名直等閒  
欲以殘年奉香火塵勞無計戀松關

挽張直講

早歲英聲已絕塵暮年高節更殊倫絳帷久擅詩書樂  
朱邨頻釀酒醴醇不許功名書竹帛祇將文行照簪紳  
鄉鄰若欲存遺範祭社端宜配古今

和李清卿雪

浩蕩天花弄曉光春風未轉忽芬芳人躋物外紅塵遠

境墮壺中白晝長  
風柳冷飄三月絮  
寒梅幽寄一枝香  
朝來暴喜家風貴  
圓璧方圭滿舍旁

吳明可寄詩次韻為答

兩地相望百舍強  
相思空結九回腸  
君家滄海賓初日  
我戍衡山俯夕陽  
情話何當傾肺腑  
倦游聊復信行藏  
求田問舍真長策  
捧檄榮親道更光

房公湖

余兩過漢宿房公湖  
上不暇題詠任德廣攝



郡事來索鄙詩追賦於益昌總領廨舍

金雁橋南二頃湖房公遺迹未湮無人遊杜牧晚晴賦  
境對王維別墅圖經始林泉心自巧折衝廊廟術何迂  
當時只作幽人計留得陳陶四萬夫

皇華館以上已落成因修禊事題詩紀之

泉上新臺紫翠環暮春修禊俯潺湲漢流尚帶桃花水  
雲氣初披杏子山柳絮輕颺晴日暖竹光不動午陰閒  
時和歲稔游人樂一醉聊開病守顏

杏子在軍之西天  
每欲雨則此山出

雲收則  
雨止

呂叔恭運使和題皇華館詩復次韻

何處溪聲響佩環  
洗心堂下轉潺湲  
數株古柳枯臨水  
百畝叢篁翠倚山  
歲久刊題多泯滅  
時清景物自幽閒  
輶軒登覽留佳句  
頓覺林泉發妙顏

帥漕復次韻再和

二豪詩律晉江東  
迭倡更酬卷軸豐  
狎主齊盟爭定霸  
互為勦敵銳臨戎  
波瀾已得江流助  
組麗仍依錦段紅

入蜀詞人多妙句向來嚴杜一編同

中秋同兒姪登寶峯亭

絕頂憑欄思有餘  
滄江下眺眇三隅  
月光此夜十分滿  
風色今朝一點無  
鄉國不須悲楚蜀  
庭階且喜集封胡  
史君邂逅分鮮鯽  
斫鱸還成逸少圖

缺題

天梯雲棧轉龍旗  
細雨淒風暗路歧  
七夕難忘祈巧夜  
三鄉不似望仙時  
曲江若悟賢臣語  
汾水寧傷才子詞

此日鈴聲腸斷處後庭遺唱未為悲

大龍湫

余聞大龍湫之勝舊矣歲暮來游水泉收縮  
僅存微溜無復壯觀與平時所傳不類殊未  
快也因留此詩以為再來之約

瀑水傳聞舊壯哉飛流亭下久徘徊玉龍鱗甲寒猶蟄  
銀漢波瀾凍未開斜日湫潭微濺雨深冬天地不鳴雷  
斯游未快平時意更擬他年得得來

次韻劉南伯二首

曉來庭竹碎秋聲  
令我思君重愴情  
三畫當年曾擅價  
五言今去合知名  
賦歸已荷因風寄  
驪與終期對月傾  
但願官軍破驕敵  
不妨淮海寄餘生

十年蹤跡困遭如  
多謝韋郎肯寄書  
千里漫尋苔水夢  
一厘方對相山居  
歸心不為蓴鱸切  
交契應閑簡牘疎  
近向錢塘得嘉種  
秋盤何日共新蔬

次韻王園中二首

網得金鱗不忍烹一甌春菜眼偏明逢君強賦湖陰曲  
顧我方趨日照城散坐醪醑留客醉過庭鴨鷓為誰鳴  
還朝密邇非輕別知有蒲輪訪姓名

舟兀東風怯曉寒綠楊堤畔見青山溯流不礙朝天去  
掉鞅何當拜命還半世光陰憂患裏他時勲業笑談間  
兒童似覺吾衰老只欲西歸便丐閒

次韻制帥和王憲二首

淮水綿綿不絕流渡江龍化復東遊宗盟尚詫當年盛

交分還欣此日投名並邛郫公等繼政稱京兆我難酬  
得時俱為公家計三窟寧當各一州

二麥初收堰水流西園飛蓋使君遊羽旄每出邦人喜  
壺矢閒同坐客投膏雨應時和氣洽豐年有兆頌聲酬  
政成訟簡追胥息鎮靜西南五十州

次韻陳勉仲見留之什

新詩俊逸走風雷愧我馳驅欲強陪花外疎篁青掩映  
門前流水綠縈迴高情好客長留客勝賞傳杯莫放杯

金史卷一百一十五  
老懶畏寒朝睡美報章淹緩莫相催

寄制帥

五郡馳驅兩月忙少城春事杳相忘  
鵲鷓鳴處韶光老  
鵲鷓聲中旅思長曾為青山迂客路  
莫偕紅旆訪仙鄉  
浣花時節歸期近猶及遨頭共一觴

和制帥

離索堪驚歲月忙少城遺愛未曾忘  
西園尚記英遊並  
南浦空嗟別恨長壯志且窺勲業鏡  
高情休憶水雲鄉



玉關柝靜邊烽息漢殿歸稱萬歲觴

和制帥

按部經時走四封雲山有路寶巖通普賢相對圓光裏

摩詰不離方丈中

公自稱遺安居士此句謂公不預遊山也

喜有篇章交寄遠

恨無羽翼可凌空來詩忽作蛟龍吼三日能令兩耳聾

自憐麋鹿性疎頑心在雲林迹世間每厭塵埃驅俗駕  
不辭險阻訪名山池魚得意時歸壑廢馬長鳴暫出關  
萬仞峯頭曾進步禪機一撥透三關

力求見佛上天梯忽覩光明志意迷華藏神通驚變現  
臺山公案好拈提太沖漫作三都賦子美全無一字題  
今日諸賢賡妙句彊驅鴛鴦力難齊

卿月中天照上流使星入蜀久西遊蟠胸經緯開碁局  
出手梟盧轉博投學有淵源流不竭詩如珠玉價難酬  
詞章怪底猶雄健棠蔭曾聯柳州

又和

勝遊每恨不相同郵遞猶欣日日通玉帳未容佳境到

雲山已在好詩中  
靈珠忽富千金贈  
凡馬堪嗟萬古空  
展卷高吟知幾過  
大音一震耳根聾

塵勞汨沒老尤頑  
徧走岷峨杳靄間  
筋力已疲難報國  
田園有計即歸山  
何期俗駕經時出  
却得浮生數日間  
已請一麾江海去  
故應生入玉門關

新篇孤峻絕階梯  
照眼光芒五色迷  
已向詩壇稱獨步

不妨祖令更全提

來詩多  
雜禪語

真空雅與高情契  
絕景終希

大手題餘事  
文章暫遊戲  
要將李杜與名齊

住因得坎去乘流萬里西南更倦遊三徑未成歸計晚  
一尊猶喜故人投小篇偶寄詩筒去佳句還勞驛使酬  
得與諸賢更倡和故應盛事播西州

渾醉庵詩并序

襄陽姚格去非弱冠出入兩學逾四十不第  
一時場屋故舊班班為顯人而去非落魄混  
於酒徒窮日夜以飲無算中間得病瀕死朋  
友止之稍止而復飲今年長矣量少減而嗜

之不衰雖常以此病然其所以安於沈滯而  
無羈窮流落之歎者亦酒之力也丞相高平  
公來丹丘鄉間親舊依之數十家酒醴之會  
去非無不與蓋一日不飲則愁思無聊若不  
可過者脚逡巡諸好事之門必得酒乃已酒  
盡輒去挽之不留也高平公既為設醴諸鄉  
人亦更飲之而去非又善俯仰人事與物多  
可旁尋外邏不擇所主有酒輒從之是以能

活於此高平公因名其寢曰渾醉庵鄉人王  
某賦之以詩去非曰幸甚凡與我遊而能詩  
者吾皆將請馬子併為我序之故云

人間歲月都幾許醉裏光陰差較長千日不醒終有盡  
百年渾得要為常故人屢過無窮巷一室能寬有醉鄉  
好事不妨多酌我老來無復次公狂

又題鴻祐寺

石佛山頭日欲頽尋僧不遇嬾空回青鞋布襪雲門路

柱杖穿林歸去來

戲景思

明鏡佳期故未忘  
月圓人缺恨何長  
陽臺朝暮誰為主  
夢裏時時怨楚王

顏色傾城藝更精  
愛卿長是說卿卿  
卷中昔日崔徽貌  
重見應憐太瘦生

題鄧寨周氏小園詩

徑草荒春綠作堆  
東風深入小園來  
可憐幾陣嫣香裏

金一八八  
卷二  
立盡庭前數樹梅

病餘兀坐偶成二絕

寂寂經旬病卧家起來都不記年華一聲檐上驚秋晚  
墻外初聞賣菊花

病骨藥藥瘦轉加秋風怯傍小牕紗蕭然丈室維摩觀  
一炷清香到日斜

倚江亭會上虞伯遠送梅花并二絕句坐上次  
韻併調賀子忱



腸斷江頭索笑花三三兩兩逐枝斜忽隨清絕驚人句  
來自西湖處士家

喜見江梅又著花挿來不怕帽簷斜高標幽韻誰真似  
人在風流賀監家

賀子忱家侍兒  
有以梅名者

和姚令威春陰四絕

急雨顛風帶海烟白頭腸斷落花天東風為買春光住  
柳撒黃金榆擲錢

十日春陰晝景微鳴鳩逐婦幾時歸柔桑細麥寧馨長

落絮遊絲可解飛

雨過山村綠滿陂紅芳漸少翠陰低春風吹草依然碧  
潮水浮花却自西

休對風光感物華且將春酒趁春賒一聲杜宇芳菲晚  
只有荼蘼芍藥花

題延慶觀六時泉

千尺高崖屏翠琰六時甘露雨真珠梯巖穿壑身親到  
始信仙靈境界殊

和尚書李丈六絕

丈人詩律照青春句到諸郎副析薪特許八分傳阿買  
囊收珠玉破清貧

風光無賴惱詩翁健筆凌雲思未慵長句數篇欺白雪  
江山浩蕩發春容

近侍三朝捧御牀宮衣猶帶內家香殊庭更得流霞助  
杖屨春風步履彊

休論世事苦悲辛龍卧南陽自有人指日承明却歸去

烟花紫禁及青春

經旬山雨暗春輝  
桃李成陰總未知  
試逐東風入城市  
不妨尊酒暫娛嬉

雨過千山翠色重  
羣花欲盡絮飛空  
牡丹寂寞芬芳晚  
日暮朱欄獨倚風

題真符道中山寺

江路南風漲白沙  
鐙驢來憩梵王家  
片雲忽作蕭蕭雨  
夢斷僧牕日未斜

題前詩已天忽作雨戲成一絕

歲暮靈泉水未饒蒼崖無復舞飛蛟詩成不覺天零雨  
料得神龍欲解嘲

鐘鼓山間久雨二絕

山雨蕭蕭不肯住天寒雲愁光景昏桃李紅白春風面  
有恨無言空淚痕

高林縹緲彊可見茅屋半山烟雨昏誰家一幅鸞溪絹  
古畫猶存水墨痕

次韻王司戶梅花五絕不得用古人意及比婦人玉雪并潔白等字

牢落天涯邂逅逢清愁幽恨與誰同故園腸斷三千里  
客裏看花歲又窮

溪外人家處處栽三分蓓蕾一分開故教嫩萼參差發  
似要幽人次第來

可耐幽花發較遲慙慙為倩曉風吹朝來策杖探消息  
香處初開一兩枝

聞說江梅已惱人，衝寒著意去尋春。  
枝枝細看枝枝好，歲歲相逢歲歲新。

一歲都來幾日開，一開能得幾回來。  
清尊留待溪邊月，不怕山城晚鼓催。

和錢處和梅花五絕

萬木歸根冷未滋，可憐孤絕發寒枝。  
心期本在冰霜後，占得隆冬未恨遲。

枝上春風漸有涯，斷魂初見兩三花。  
一尊盡日看無厭。

更待參橫月影斜

莫欺玉藥瘦藥藥中有江南長恨端白髮天涯歸未得  
年年老眼淚中看

鐵心開府不妨狂賦語清便獨擅唐堪笑離騷窮逐客  
只知蘭蕙有幽香

林下風神物外姿閨房秀色鑑中奇兩家標韻誰兼得  
會有多情識者知

以鼎鑪遺關子東有詩相謝次韻



君家聚古無不有不腆敝器何足奇  
兩首新詩愧虛辱  
恨無郛鼎為君移

贈君劍川八卦鼎一餅清泉終日然  
淨几明窓讀周易  
妙香時炷不論錢

送海棠與姚令威

酣酣芳意不勝春一笑嫣然惱殺人  
分寄多情還解否  
要教國色在東鄰

謝景思惠酒并二絕時宗守邀看上元景思不

至次韻

戶外驚聞剥啄聲東山消息到柴荆  
兩章著意撩衰白風味相扶有麴生

使君高會著幽人燈火元宵醉夜分  
博士從來文字飲不妨聊復醉紅裙

饒守陳粹中有詩見留次韻為謝

相逢一笑又相離腸斷登臨送別時  
久占都亭慚重客秋風回首片帆遲

郢守喬民瞻寄襄陽雪中三絕因追述前過石  
城杯酒登臨之勝為和

滄浪渡口莫愁鄉萬頃寒烟木落霜珍重使君留客意  
一尊芳酒醉斜陽

江上危亭思黯然追遊陳迹欲經年別來西望應相憶  
郢樹荆門共一川

白雪樓傾不記秋樓前江水自悠悠多情猶憶湖南守  
一曲陽春白盡頭

僕舊遊白雪樓見張休詩石刻尾章  
云美人莫唱陽春曲白盡湖南太守

頭今石已亡民瞻詢於老吏  
遂得其全篇云將復刻諸石

